

## 來學校上期待的時間

王英娟

「秀娟阿姨，後禮拜的菜單會使借阮看袂？」「好啊！恁若有想欲食的物件攏會使共阿姨講，阿姨會當請廚房阿姨煮予恁食。」「誠實的喔！會當看菜單，閣會使家己點菜，佇遮讀冊有夠幸福的啦！」「彼は當然的啊！絕對愛煮恁恰意食的料理，嘛定著愛攢恁愛食的點心！因為恁是阿姨上重要的人客，人客食了有滿意，就是我上大的快樂。」

秀娟阿姨設計出來的菜色逐工攏無全，予阮遮的學生囡仔，平常時仔除了會使食著衛生的飯菜，閣有麵包、雞卵糕、豆奶、牛奶、蘋果汁……足濟項點心，逐工都輪流咧等阮。食著的各種菜蔬、果子也攏是上鮮、上著時的，予阮食甲飽tin-tong閣食著滿足。若拄著舊曆的節日，猶閣有割包、肉粽、圓仔通食，遐濟物件予阮食袂癢癢嘛食袂飫，毋但食飽、食巧，閣食著營養，上重要的是食著一種幸福的滋味。廚房阿姨的手藝有夠讚，毋但鹹泔下甲拄仔好，閣有法度煮出秀娟阿姨開出來的種種新菜色。阮全班便若看著廚房阿姨揀餐車來教室，連鞭就同齊共廚房阿姨講：「感謝你一粒一的服務，嘛感謝你辛苦的付出。」廚房阿姨就會笑叻叻。

啊若秀娟阿姨咧？伊毋但定定會先去廚房試鹹泔，閣會不三時來巡看阮逐班食中晝頓的狀況，溫柔仔問阮講：「飯菜有夠無？料理有恰意無？」繼落去，伊閣會共阮歡喜食中晝頓的畫面翕起來，傳起去群組分享予家長看遮的寶貝囡仔食甲真樂暢的模樣。

我捌共阿母講：「學校的愛心媽媽遐爾濟，用心共我飼甲肥胸脯，予我有氣力認真讀冊拚頭名。厝內的阿母干焦你一个，煞惜我惜甲疼命命。全款驚我枵著，散學攢點心予我紮去補習班食，轉來閣有阿母牌的宵夜通食。」阿母笑笑仔回我講：「恁學校的護理師阿姨看著你生肉閣生甲遮爾緊，面腔料想會加真歹看喔！」

若問我來學校上期待的是啥物？是上電腦課、體育課 抑是下課咧？我會講：「攏毋是，我上期待的是食營養午餐啦！」